



Minggu, 24 September 2023

Ogen : Amos 6:1-7



Perbahanen Ngerehken Kecedan



Biak egois enggo reh buena, mahanca riahen niakap natap kempak diri jine. Buen ngukurken kesenangan, keperlun dingnen kepentingan diri asangkan natap kempak keperlun kalak sideban. Enda ikataken egois.

Bangsa Israel bas ogenta ngejapken geluh i bas situasi aman, dingnen senang i Sion ras Samaria. Ingan enda ingnen pengadun kalak si enterem, e maka rehhen me kalak ku je. Erkiteken si e igejapkenna maka ia bas posisi aman, seh maka lanai natap ku kecibal kalak sideban. Padahal situasi ingan si ndeher ras ia sangana i bas keterancamen, janah bahaya. Enterem sangana ngalaken kecedaan, tapi erkiteken posisinya aman la itangkelina, janah la diatena pe. Pas kel bagi kuan-kuan singataken "gundera salah gundera, beluh belin ku benturi, kutera kalak kutera, beltekku mbelin ku besuri" lanai mediate, ras metenget nandangi kegeluhen kalak sideban sekelewetna. Sipentingna ia teneng, aman, senang ras besar. Bage saja ngenca iukurina. Silakokenna medem-medem bas ingan si meherga, mangani pangan entabeh (daging lembu ras anak biri-biri), rende-rende, minem anggur, make minyak wangi si merim ras sidebanna. Kerina perbahanen silakokenna e situhuna maba celaka man bana. Akapna ia aman, tapi ia me sipemenana ibaba ku bas pembuangan. Bage nina Dibata arah nabi Amos.

Lanai mediate nandangi sekelewet jadi erkiteken perukuren ras perbahanen terlalu fokus man diri sendiri. Maun niakap maka aman tapi situhuna e maba celaka kap. Bage me persinget isehken Amos bas paksa enda. Kegeluhen la terlepas bas kalak sideban nari. Kita enda makhluk sosial, labo banci terjeng ngukurken dirita saja, tapi ingetlah keamananta mbelin ipengaruhi kalak si sekelewetta. Guna si e perlu kel kita mediate ras rukur kerna kiniulin sekelewetta, sebab kai sinanami sekelewetta sinanami ka me.